



05314

紺寒亭詩集卷二

古今體

詩三百三首

嘉定趙

俞著

玉堂寒爲編修許山濤先生賦

先生之官玉堂仙玉堂近天高且寒玉堂詩人詩格清
高于玉堂寒于官奇詭宜搜鬼神祕騰踏欲窮天地寬
當其腕力怒生筆花發溟渤漲翻蛟螭蟠才情爛熳轉
孤迥總無一點塵土犯毫端正如漢家赤瑛薦朱櫻月
下瑩澈但空盤賤子落托困飛搏思腸窮餓衣裘單先
生父子驚顧歎脫畧禮數盤桓靜氣孤峰對石澗清
言微雪洒庭蘭時解金魚付酒庫亦割月俸具豬肝誰
與偕者追古歡毘陵王子崇安潘

謂王崇玉潘綱章二同年

當筵拓

紺寒亭詩集

卷三

帚墨未乾險韻奔猱下急湍作者手敏天機迅豈知絕
巖峭壁躋攀難先生詩貴官不遷先生詩富囊無錢好
官多錢亦安用富貴瞥眼如雲烟但得新詩千首百首
傳三公萬鍾肯易焉先生豈是時世賢賤子欣慕爲執
鞭

送孫鼎文之任銅陵

孫浦城人將返故里以明春赴任

極目泉山萬里遙拜恩初出紫宸朝歸鞍曙拂千巖雪
畫舸春乘二月潮玉樹臨風叨接席金門曉騎許聯鑣
燕臺把酒三年隔不覺尊前絳蠟銷

上座王南昌尚書公三十韻

民譽卿材擢臣清國論稱金鐘知貴重玉斧仗威稜敷

歷居臺閣升沉變谷陵位仍三獨坐節似一條水俯仰
成今昔低徊感廢興逸羣千里奮菘苑九霄騰志在鷹
鷂逐身俄聽馬乘官邪霜拂簡后聖木從繩考蹟勲名
懋遷階寵秩增司空伯禹宅少宰貳公登柄且平軍國
才應作弼丞忠遭鄉士譖衆害大夫能碎首原防鵠無
瑕豈玷蠅岡雖炎玉石派乃別淄澠呂相初無黨虞廷
自一朋江干林壑臥闕下璽書徵其代天喉舌汝爲帝
股肱垂裳資火藻故浦別魚菱二府嘗虛席羣公舊服
膺登庸若采待翼亮厥躬勝擬汰河流濁還教海宇澄
業看光稷契文亦紹歐曾棠棣花芬馥芝蘭氣蔚蒸陰
陽有剝復日月又升恒問字曾操几端居忽挂罽甯俞
紺栗亭詩集

卷三

二

愚足錄公治罪宜矜霜雪侵雙鬢犁鋤老一脰同人多
結綬偏我愧傳燈倘附追風驥猶爲駕海鵬可能添羽
翼再得上陵憎

天氣連日陰晦欲雪不果作長句紀之

低雲幕空天昏黃庭霰初集輕于霜天意欲雪不能雪
如米釀酒未得漿俄作霧松失檐樹又漏熹微射紙牕
長安貧者寒無裳何不消此霾墮開晴光不然亦須大
雪三尺強殺却螻蟻蝨賊蝨蝻蝗明年禾稼無災傷吾
聞上天有真宰奈何乍陰還乍陽任彼纖阿列缺屏翳
滕六負勢爭低昂旅人對此掀髯但一映天地萬物皆
亡羊雪深可蠟屐日暖好負墻薊酒三杯已落肚黑甜

且入無何有之鄉覺來不問日昏曉鼻間楷柚爐火煨
芋香

頌袁宜人二十韻 同年翁康館母夫人

東漢三公系西陵一女宗夙齡姿婉婉內則禮雍容侍
藥誠能格嘗羨命益恭晨興催弋鴈淑配是乘龍羊子
歸猶織鴻妻賃亦春官曹寒苜蓿詩句秀芙蓉友解衝
牙贈賓留截髮供瑟琴調在御弓冶邁前蹤下璞終藏
積庖刀正及鋒庭闈輝玉樹廊廟發金鐘畫荻曾勤課
緡錢不啟封鳩班家慶集翟第國恩重莊墅依城堞湖
山疊嶂峰烟嵐螺黛點水月冶銀鑠奉母穿青靄攜孫
坐綠茸春明葛嶺度孺慕板輿從鼎自天廚饌針堪帝
紉寒亭詩集 卷三 三
衰澠流芳彤管美湛露紫霄濃末契叨王貢徽音仰郝
鍾德門綬福履奕葉勒勲庸

題姜西溟洞庭秋望卷

我知先生我尚少我見先生恨不蚤馬上相逢憶丁卯
丹頰蒼髯鬢欲縞是日風塵正溷洞頓覺濕翠晴空掃
先生見我癢爲爬我見先生饑得飽去年瞥眼逆旅間
骨格峻嶒一孤鷄怪我冰霜顏面枯愛我瘦寒詩句老
先生文奇草隸妙蕭疎如共竹柏清倔強能與鬼神拗
捉筆微晤忽狂叫細者蠅頭大栲栳我亦從旁助力勢
直就手中奪草檄東西過從互主賓彼此唱酬失昏曉
我遭世難集茶蓼君且各塲打毘毬知君文章不薦達

爲君一生氣孤峭誰爲先生寫此照雄姿蹶張如驃姚
斯人何人隱者歟而乃一竿五湖釣先生掉頭更不言
巖岫窅冥水蕩潏劃然但聞鸞鳳嘯

送同年沈昭嗣之任監利

荊州介江表監利近肘掖頗聞山水勝亦苦俗險棘文
簿一填委所司且咎責沈子神觀恬旁觀或不憚坦途
有顛蹶何但羊腸仄氣如養嬰兒心如攝強敵靜則神
理通順乃糾紛釋如人遭風船艤脆防壅溺身與船下
上已忘船艤脆意一與船抗眩掉輒歐逆又如解亂絲
紬釋理緒得彼或心氣竈愈解縛愈急沈子今真儒完
養具清識隨身所遇安其視夸險一耳聽口酬荅手持
紺集亭詩集

卷三

四

足循級官止神則行百應百不失處事皆就理用人亦
得職此可宰天下區區寧一邑

送同年潘綱章之任曲沃

青松凝膏露甘芳逾乳酒苦竹飄積霰槁禿類堊帚眞
宰理亦均品物乖所受豈能彼敷腴迺潤此凋朽君家
幔亭峰白雲生衣袖巖茶絕品收谷蘭奇葩秀宰邑介
河汾民淳土豐富廣塵京洛擬珍貨燕吳走君又爛賦
咏神味得韋柳咀嚼出宮徵山泉寒以瀏清才况廡仕
於今有此不經綸素醞釀功業在馳驟其視阿堵物齷
齷眞何有君固礪志節毋亦念朋舊君材國棟勝我骨
霜筠瘦分曾膠漆投命已雲泥剖筋力任耘耞陂塘鏡

菱藕再拜謝故人不足煩援手

送同年錢菽暢之任蒼溪

錢子魁壘姿氣若波浪湧談笑胸臆開慷慨鬚髯動意
所悅可人直欲性命共憫余遭危禍切膚勝已痛注選
得近地飲助許割俸川北一彈丸而乃屈鸞鳳譬彼大
黃駑但爲廳鼠中豈足勝全力怒勢有餘勇天地生汝
材小大信所用况聞褒斜間咽喉秦蜀控高江千尺懸
攢峰萬劔聳礪汝骨堅強添汝筆放縱成汝公輔器造
物意嘉寵夢想蜀山奇窺天思出甕雪霜危棧怯不獲
執鞭鞚坎珂守磨蝎束縛類繭蛹彼中產寶布一匹綺
錦重如念故人寒可能遣騎送

紺寒亭詩集

卷三

五

午門賜觀御書恭紀

四言有序

擬作

祝融响嘯之刻岐陽石鼓之鐫雄視百代凌跨千秋
謂非皇王之極軌史冊之美談哉然皆文學侍從之
臣粉飾太平斧藻至德而已非必天章煥爛宸翰揮
洒也是故魏家殿榜之懸題由韋誕唐宗戈法之妙
得自歐陽然則天縱多能羣臣莫及自昔希遘 聖
人乘乾超軼前古游心絕藝符合造化仲夏閏月之
十九日傳集午門賜觀 御書功存河洛昌明仁義
嵩高峻極靈瀆安瀾四題額凡十六字肖圭璧之圓
方應乾坤之闔闢玩其輕拂徐振緩按急挑之法游
龍舞鶴未足擬其神姿渴驥怒猊豈能仿其力勢固

袁昂所不能評楊泉所不及賦也臣躬睹斯盛心目
愕眙次早謝恩復蒙茶燕禮意稠疊無以爲喻紀以
四言一首鼓腹之歌擊轅之唱用貢愚忱忘其蕪塞
也

曰嶽與瀆蓄洩雲雨潤及千里曰聖與賢參贊天地功
存萬世廟食豫壤惟神所棲匪今伊始 帝曰欽哉其
勅有司祇承厥事 帝曰欽哉璇題銀榜予其特賜字
凡十六數之以四大尺有咫命集廷臣汝其予爲惟力
是視于時廷臣再拜受命奏能効技 天顏一顧蓋曰
佛哉未稱任使一日便殿宣石鄉侯詔管城子旋者中
規句者中鉤折者中矩如龍鸞翔如鵬鷁翻如鷹隼起

紺寒亭詩集

卷三

六

崔張義獻帖耳俯首瞪乎後矣觀其筆勢相其骨力不
可涯涘直與兩間鬼神造化同根一氣 聖學崇深百
千萬億曾未一二豈臣愚陋管窺蠡測能名所以巍巍
煥煥道接鄒魯德媿姚姒綿綿延延與水同流與山同
峙

贈江西督運王副憲

勳名激歷著邊陲帝簡天南駐節麾饋餉軍儲司轉運
屏藩牧伯待叅知氣凌五老嶙峋色筆繼三王絕妙辭
旬月政成人吏肅傳聞兩府牘交推

范方仲精篆刻贈以絕句

權侔主爵亦雄哉銷印還能刻印來漫叟但耽林麓趣

特煩妙手起亭臺

文待詔自言每于圖記上起亭臺

余家雷墩浜上竹垞魚塘可供吟眺時與山妻度
畧約課耕獲行溝塍間意甚閑適邁世難客京師
三載斷梗飄蓬隨緣棲泊回念疇昔恍如隔世未
知餘年尚能享此樂否也抒寫胸臆得詩四章

旅鴈泊寒渚墨燕銜春泥所托各異域歸亦各有期雌
雄相追逐子母亦因依天邊一窮鳥乃寄他巢棲豈不
念鄉土風雪摧毛衣故雌鳴嘶酸况有黃口兒仰睇雙
飛翻悵此形影睽有家長離別雖生奚以爲

京都市朝集雜糅紛亂麻聲勢走搢紳下亦利姦邪我
于世無求棲棲何爲耶弱齡負奇氣筆燦扶桑霞昔爲
紺寒亭詩集

卷三

七

蟠雲螭今爲失穴蛇進退鮮所據浩如泛海槎咫尺蘆
溝渡濟曾不濡軌欲歸歸不得愧此桑乾水

我家溪南村溪流抱村曲沿流萬竿翠插天圍老屋春
夏雜英繁長藤絡古木蓮芡滿陂塘鷺鷥白於玉逸情
時孤往野趣寄遐矚三年別此來夢境猶在目坐吟溪
橋上新月浸寒綠無端忽攪眠饑鼠窺殘燭

家世本老農幼曾親犁耙壯雖困行役菑畬得乘暇大
婦知課耕小婦行次亞秋風稻花香十畝紅穠稚稚子
隨母歸手亦有禾把此樂未易再老境殊噉蔗家有乳
下孫不教入學舍慎莫似阿翁擇術良已下

潘綱章納姬人同之任所戲贈二律

靈看犀一點濃愛翠雙眉絡秀相逢地羅敷未嫁時門
因此女貴匹是使君宜音果吳孃否燈前細語知
入郭真仙吏同車有麗人檀奴雙璧映花縣一鶯新茶
潑圍爐夜香銷半臂春莫教官燭燼蓮漏已催頻

翁姥詞

上堂見翁姥語笑相和諧晨昏寢食共乃云有嫌猜翁
欲獻酖毒此豈新婦爲婦覆手中酒躡此升堂齎翁意
終不言亦脫姥于危翁姥詈罵交婦死良已遲若問翁
姥意中事新婦到死那得知

同年唐子寶君選授朝邑令 特詔召試稱 旨

擢授禮部儀制司主事兼辦翰林院事自昔綴文

紺寒亭詩集

卷三

八

之士多矣受知 聖朝膺茲異數于稽前史良爲

罕遘謹撰一篇以紀休美云

精鏐不可使投鼃良璞不可使抵鵠天生重寶寧襲用
鴻材自合居臺閣文家才薄學殖荒杖蘆嚼蠟傷淡薄
先生雄博力扶衰吐吞日星簸海嶽凌韓轅蘇輕餘子
六百年來無此作當日玉堂失掄選銓注河西一大縣
輝赫才名動 九重當廷交口公卿薦有 勅傳宣遣
騎催草莽之臣許燕見 內府特出陟釐箋從官親俸
涵星視脫稿萬言漏未移勢挾風雷迅掣電蔚作夏雲
蹙奇峯燦若春叢發芳甸 至尊嗟賞 詔傳觀宿老
詞臣拱手斂翰林供奉儀曹郎不必遷除循故典杜甫

落筆中書堂李白醉登天子殿文章遭遇似此稀特爲
才人開生面先生弱歲知名早四十餘年樹旗纛從此
十年作宰相五十登科未爲老君似菁葱嶺上松我比
凋枯澗底草人生榮悴各有分何爲鬱鬱縈懷抱未聞
田家老瓦盆好盛黃流薦天廟

題查夏重放鴨圖四首

須慮舟輕葦岸邊一篙插處水紋圓舟中方作華胥
夢鴨亦晴灘相對眠

相喚相呼出入偕歸來夕照滿西厓指揮小用行軍法
兩翼分行一字排

過雨黃梅水拍堤襍稊已覺羽毛齊將雛共入天池去

紺寒亭詩集

卷三

九

可復蘋花戀故溪

夏重父子同鄉薦

飲啄何曾似瓠肥亦無文采炫毛衣綠頭只爲能言誤
不得追隨一隊飛此蓋自况

奉輓座王建安侍郎公十首

前史耆英內何人可輩行律躬百行備待物一誠將鄉
黨太丘長朝廷司馬光留公在宇宙元氣未銷亡

馳驅許國早坊表立朝端共事忘門戶昌言吐肺肝一
家羞倖竇三品序遷官寤寐知無疚如公歿亦安

能自捐身累何曾與物爭忘機天廣大寡嗜水空明和
豈同流俗清原不近名無煩追琢力完璞自生成

匪敢阿私好清忠不可泯事皆從目擊論到蓋棺真史

傳名臣首碑文

御製親同時望恩澤異數愜斯人論

僉謂我師宜膺異數蓋豫期之

七閩留正派四子接真源

朱蔡胡劉皆建寧人

學問無權術文章

見本根治能三代復脉得一支存俎豆宜專祀千秋廟
貌尊

問常修縞紵供但給齏鹽治具朝衣典窮交食指添心
胸開洞達禮貌降尊嚴不屬門生籍今朝亦淚淹

七旬誇老健二豎近交攻坐每愁偏痺驚看減下豐便
乘黃鶴去竟應白雞終豈是先生病斯民斯世窮

甚感丈人意能推當日心災憐無妄得痛悉不言深篤
論存公道微誠動士林爨琴有知己指下發哀音

紺寒亭詩集

卷三

十

愧我三年裏增公一倍憂羈棲叨叅養垂問及彌留乳
哺于今失師生有此不苦無尺寸地報荅更何由

近憶生前語如瞻有道容身疑依絳帳夢斷是霜鐘
合三年守車思千里從天南精爽在今到幔亭峰

寄園歌爲家恒夫給諫作

寄園在何許乃在慈仁古寺之東南天街紅塵高十丈
遙見攢翠滴層嵐上有春曉蒸雲之蒼巖下有霜空印
月之澄潭曲磴盤廻迷出入兩行拔地皆杉楠長藤蟠
結老龍怒欲奮爪鬣張鬚髯園中何所貯珍珠壓槽一
百斛錦罽插架五千函主人吟興每孤詣亦時與客共
追採不知晦明易不知寒暑移但收滿園溪光山色入

一簾主人何年得抽簪卽今猶帶朝官銜九重方念舊
羣公正具瞻齒髮未衰筋力堪此身未許泉石淹主人
泉石性所耽遊賞亦不廢朝參晨趨絳闕花迎佩暮歸
平泉雪覆檐山林朝市二樂兼如人食蔗老愈甜閑中
小試平章手已覺禽魚卉木皆熙恬謝公絲竹意清酣
遇未封胡不我嫌時時命駕東山墅許我從容共手談

題柘城寶筠峰先生祠

先生名如珠字帝珍與湯潛菴先生同講學爲潛菴

所推

百尺巍巍是禮門清流環帶遠峰尊蘋蘩筐筥羞時薦
栝柏烟霞鎖繚垣學有淵源傳北宋天留文獻在中原
何年道出朱陽近獲與春秋一駿奔

紺寒亭詩集

卷三

十一

送同年唐磐菴之任鎮海

首春車騎渡清淮官署風流亦可懷潮送月明環近郭
嶺含雪色入高齋宦囊添得詩篇富書問遙知海物佳
不日政聲傳北闕故人留滯客天街

次韻荅海陵宮友鹿兼呈姜西溟唐東江楊韻木

諸同志

到京三歷三冬巖顛毛種種枯髭髯挂鱗雖幸宜網脫
鍛翮正苦泥坑淹出門對人羞縮瑟三日新婦閉車幃
不能備保賃春碓不能操作織箔簾廊子分宅古高誼
暫如春燕巢屋檐胸中煩冤無可訴口欲哇哆有物鉗
南望鄉井歸不得雲山萬疊碧天粘朋輩時來強慰藉

不識痛癢論針砭

用黃浩翁語

山妻老瘦兒駸稚白首乃不

寸祿霑吁嗟吾衰亦已矣紅爐未燎鴻毛纖精氣銷亡
家產破餘剩僅此筆鋒銛宦興不敵詩興豪焉用詹尹
拂龜占近逢詩老皆雄霸昧者欲攻弱者兼姜侯遠掩
姜公輔唐侯豈數唐彥謙我每當局不敢賭斂枰收子
入碁奩君與弘農尤英敏一日能成五丈縑以我下材
抵四傑椎鈍那比卓錐尖謬欲芝蘭同臭味無乃煎茶
攪薑鹽公等虞裳繪火藻我獨秋水一霜兼江南四月
二麥熟率我婦子同腰鎌野麋山鹿有本性休爲京洛
緇塵沾負薪謳歌郊廟樂或爲天飛或泥潛樊邈采齊
大制作異時流播及閭閻餘年散髮江湖上願學詩仙

紺寒亭詩集

卷三

十二

白玉蟾

同年朱信昭母夫人八十

練水新洋

各江

百里賒雷陳契分舊通家數留范式供雞

黍曾侍宣文隔帳紗奕葉清聲看諫草一庭春色煖交
花捧觴再展登堂拜象服魚軒鬢未華

藏藥九笥中鼠耗其大半又損余衣冠作二詩歎

之

筐篋虛何有九丹病所須乘時燈月黑欺我夢魂孤智

計成三窟朋徒在一呼衰齡齒髮損看爾白如瓠

昨已無心置今還非意干利惟憑觜爪毀乃及衣冠在

爾曾何補於人已不完世途機網密獨爲此蟲寬

宮友鹿疊前韻枉贈再疊韻酬之

詩筒催詩軍政嚴東西郵遞走長髯弩末尚思穿七札
豈便才盡同江淹硯屏筆架鎮相守四壁縣如車圍幘
臆紙隙光漏白影康王飛瀑捲水簾周環洛誦循床走
不覺矮屋欹帽簷硬語盤空迸口出迫束未爲險韻鉗
此唱彼和往而復驅驢二物互連粘東江西漠况詩伯
許指瑕額予針砭先生風格力追古枯腸竊此芳潤霑
杜陵昌黎氣沉鬱玉溪長吉態穠纖開械未開已却走
怖此吳鉤葛黨銛姜唐讚歎稱希有三人則從二人占
我廁其間驂有靳求退恐遜由也兼損山之高增地卑
哀多益寡庶成謙此夕月輪吐東嶺光似粧鏡脫半奩

紺寒亭詩集

卷三

十三

雙扉已鏡聞剝啄又覘新篇價百鍊波瀾疑包滄海濶
吼啤恍透蜀山尖刊削皮膚搜脂髓咏雪才高豈道鹽
何時共泛滄浪趣罩江楓葉翻蒼兼收拾詩料歸囊底
筆力剪截快于鎌一鼓再鼓有餘勇八又八韻無滯沾
勢若捕蛇騎生馬機若鳶飛魚淵潛未計他日角壇坫
且喜今日同閭閻先生毋笑井底蛙爬搔欲效月中蟾
再題竇筠峰先生祠一首

豈獨鄉邦重老成諸儒誦法有先生切磋地接睢州近
脉絡源從伊水清栗主歲歆羊豕薦桐孫瑞叶鳳凰鳴
風徽自是千秋事未藉燕山奕葉榮

古意二首

蚺蛇能吞鹿磔确撐腸肚巴蛇能吞象出骨成林莽又
聞金翅鳥啖龍以百數谿壑難厭盈食常不滿噉攫奪
憑爪牙晝夜無停所所奉愈以奢所求良已苦不睹枋
榆雀殘粒但拾取軀小易充肥意豈復他慮世路有艱
虞多爲侈汰誤

東鄰製純素瑩澤如稀膏西鄰矜奇麗視之若絮袍美
惡無定分妍媸隨所遭未得恐不得自謂所得饒既得
隨厭薄又欲空其曹美服于人身曾未益毫毛奈何含
羞憤辱若撻市朝適已易爲愜徇人蓋云勞我本衣褐
夫亦聊以解嘲

和查夏重敞裘詩二首

紺寒亭詩集

卷三

十四

無復如膏耀日輝關河難禦雪霜威配宜東郭先生屐
煖勝西華公子衣絀絨猶餘清節在蒙戎轉覺旅情非
只應五月能忘暑披上江鄉舊釣磯

飯牛五穀事艱辛敞垢于今也足珍十載歲寒曾共我
一朝金盡尚隨人縱教索醉難沽酒何忍謀新再鬻身
多少雪中僵臥者先生有此未全貧

夢移栽月季花二架枝葉鮮好蓓蕾欲放覺後紀
之以詩

斲削長鏡甚滋培抱甕迂何緣春萬朵猶發架雙株結
習風懷在繁華夢境徂人間多勝事亦似此花無

刺繡詞

貧女工刺繡衆女云不如繡成雙鴛鴦鮮彩奪芙蓉非
但花樣別殆亦手指殊裹以綉十襲珍若塔納珠鄰父
議償直出篋還脚躅售之非其人何異委泥塗晨羞雖
已缺不以易所須高價良可欲惜此繡工夫

豆腐詩和唐實君二首

脣豆成來有化工初如水乳兩交融盡除渣滓清虛在
縱少甘肥嗜好同熟落何羨輸淡素蕪蔓亭粥欠磨礱
常餐不用蒸鵝鴨雅稱簞瓢儒者風

休羨侯鯖雜俎兼芼時但費水精鹽奏刀劈易銀絲細
下箸又難玉糝粘盤案能消肉食鄙齒牙回抵菜根甜
屋梁錢在堪酌直不損郎官月俸廉

紉寒亭詩集

卷二

十五

許山濤編修遷宮允

承華妙選知無輩宿望羣公正具瞻文筆舊留鸞掖重
宮坊今許玉堂兼猶嫌此舉循常格真覺從前是久淹
秋實春華應並賞 九重尚有渥恩霑

旅懷

極目晴雲度遠岑燕吳萬里鴈聲沉開簾看月閨人淚
對酒當歌客子心世路鷓鴣啼處醒歡場蝴蝶夢中尋
翻因令節傷懷抱三見春花發上林

遊仙詩

夙齡抱微尚耽翫巖石趣幽討願既乖夢遊茲亦屢未
辦裊餼糧何已命儔侶恍惚泝迴塘伊軋鳴柔艣崖壁

挿翠屏溪雲起白縷習習風微生軒軒霞中舉林靄乍
明晦石磴數仰俯挂藤猿一啼隔谷僧對語轉徑松門
開遙天嶺月吐虹梁跨虛空龍湫勢飛舞雲海盪心胸
水雪沁肺腑極彼勝賞探忘此歷險懼鎖鑰闕靈關金
碧豈天府髯龍眠可騎白鹿馴相乳氣若冬春交候覺
星漢曙乍疑入圖經倏又逃處所我友杳無際前境渺
何許營魂猶惘惘神骨自栩栩他年位業圖昇仙有門
戶

歲寒三詠

慈仁寺古松

枝柯猶想像鬱律似騰蛟霜月三更影風檐百尺梢僧
結寒亭詩集

卷三

十六

跌曾挂笠鶴夢舊棲巢過客徘徊意攜尊坐石坳

郊外沈園竹

愛此湘山色能禁朔雪寒煙光攢野翠天籟落風湍背
郭堂應好肩輿吾造看此君共賓主鎮日自憑闌

崇效寺梅

塵外禪關靜冰花一樹新微吟水部句驚眼帝城春驛
信愁看汝鄉思惱殺人吳中開最蚤腸斷太湖濱

借隱篇爲婁東顧抱山作

織簾先生垂青芬抱山先生家食貧婁江淪連漾月影
一卷新詩江月冷有時微醉發高歌梧風蕙露皆春和
問君食貧何以樂家有萊妻躬操作機中縑素禦冬寒

畦中松芥薦春盤上食舉案敬如賓巾櫛更爲置嫗人有子能紹父祖業行掇青紫大門闔抱山此樂誠希有彤史重見顧家婦練水婁江未別派如此家風可敬愛事非目見耳熟聞吾友東江先生云

乙亥元夕姜西溟招同查夏重宮友鹿及同年唐實君查聲山集寓齋分得花字

姜髻凌晨至入門手一叉便云蓄斗酒特自相邀遮五人先後到翁如集木鴉王客圍爐坐簇作六出花珍饌列江鮪法酒名五加君家乏厨爨味乃奪易牙唐子肅觴政全部寂不譁僻事窮腹笥搜牢徧梳爬其有餘勇者一發每五犯他人或缺漏鍊補得女媧酒戶吾最下

甜寒亭詩集 卷三 七

厄小僅一蝸一有不中治畏罰甚鞭撻人生聚還散放手比搏沙茲與數君子接迹况京華分得膠入漆直幸蓬生麻今夕是何夕六街走鈿車兒童雜鉦鼓婦女盛笄珈庭宇蟾魄墮屋角參旗斜良會不易再不樂何爲

卯明年今日夜爛醉在誰家

雙桂 述先德也

童童雙桂樹濃蔭一畝大寒翠鬱浮空漣漪相環帶植可二百年吾家祖德在宗人望衡宇田亦共溝澮一門和氣蒸族稱淳樸最禮法修恭謹服用寧儉隘到今子姓行髣髴存風槩粵自吾高曾詩書尤清灑世澤旣滋培根柯宜不壞笑笑予小子而竟與禍會如樹秀一枝

采菽 誨式穀也

田不給餽粥浸况海風作官司怒殿課債家又責諾丁
男有三人皆苦筋力弱老妻齒髮凋充腹半飢飢三載
吾羈縲身比繞枝鵲鄉書久隔濶家門難料度救口知
不暇鉛槧定皮閣既已逢軾軻寧望科第博青氈惜故
物舍此又焉托緘滕防口過水淵慎履錯善尚不可爲
敢教汝爲惡詩人采菽義勗汝乃良藥

同年翁蘿軒戶部移居斜街東以二律

舊住街南曙色連于今移傍郭西偏教因奉母居三徙
家亦如官歲九遷稍覺詩筒調句遠定貪廟市買花便
土地廟乃京師花市離羣未比燕吳隔總在長安紅日邊

紉寒亭詩集

卷二

十九

草堂不用自詠茅何氏園林得舊交

宅是高陽相公故第戶部通家也

喚友春鶯集木羈棲我幸鵲成巢雨餘遙嶺煙浮黛
月上鄰檣樹拂梢如此風光幽意愜小牕可許借書鈔

樂府三首倣張文昌

牧牛詞

大兒驅黃犢小兒騎烏犢黃犢跳擲不可制烏犢馴擾
隨人使犢入葦叢時一鳴母鳴犢應如孩嬰今年雨足
田好耕斜日橫簾牛背平昨聞府帖急星火募民出粟
許官作去西村某姓賓客賀道路喧傳高軒過小兒無
禮口諱罵阿兄何遽出人下困中新收幾斛麥我不騎

牛去騎馬

養蠶詞

桑穗綠蠶下箔桑枝禿蠶上簇一畝桑園十箔蠶壘無
粒粟頭無簪蠶絲抽盡蠶作蛹人亦如蠶眠不動蠶絲
白似蠶娘髮織就吳綾脂樣滑不中豪家剪作襪西吳
近山多桑田東吳近海多木棉養蠶作絲尚可售木棉
作布不直錢坊市俠少皆紈袴鄉里牧豎亦可惡盡著
綺綾不用布

採茶詞

山頂地瘠茶窠稀山坳土潤茶窠肥採茶日旰未得食
茶商買茶不酬直往年品目重陽羨紗帽棊盤今亦賤
京師近典武羹茶次者紫芽貴白芽巖頭僧家皆茶戶
紺寒亭詩集

卷三

三十一

籜籠箬葉裝束固頭綱蚤到河西務一網茶百餅金公
卿朝衣歸質庫嗟乎公卿買茶那敢嘗橐駝送入內城
去

宮友鹿題比鄰詩二首在便面枉贈率爾奉訓兼
東西溟東江夏重聲山諸同志

誰歟觴詠共斯晨甚有于思美且仁骨力恰如詩勁爽
風懷還勝酒溫醇孤蹤業許稱同社避舍翻思別卜鄰
珍重留題在便面天街特借障縑塵

五君朝夕每聯鑣高會連旬各見邀幸廁騷壇同研席
豈期宦海狎漁樵人如弦月迎圓影我比村江落晚潮
所賴宗工模楷近枯荄猶得發詞條

合肥相公宅憂有白燕來集墓道蓋幸徵也海內
詞人多賦詩張其事余亦有作

燕入懷中兆已成綸扉蚤歲晉阿衡今看玉剪迎風舞
却值麻衣映雪明華表鶴歸同皎潔樹頭烏哺共啣嚶
相公忠孝天應格感動還教及物生

再和豆腐詩

朝餐容易辦行廚負擔無勞入市沽玉印形模方中矩
肉芝軟美滑于酥太常齋自充腸慣丞相嘗隨有齒無
世事多從濃處壞淡中滋味勝鮮腴

送同年吳朝若補任武邑

吳前令澄邁

曾試銛鋒盤錯間庖丁此日有餘閒預知聲蹟騰三輔
紺寒亭詩集 卷三 三

舊勒文章在百蠻龍偶潛淵終躍出鳧因近闕易飛還

烏衣粉署多同調待爾來參鷓鷯斑

同年任萊源朱几山皆由邑令入補

侍御部郎

寄內三十韻

不謂衰遲逼翻茲形影睽三年神悵惘兩地話酸嘶憶
昔依環堵相期飽糗藜君能躬執爨我亦手扶犁課種
鉅籬外看晴畧約西春培笋迸土晨灌韭分畦縫紉服
生掌鬚髻髻不筭嘗羹時具肉伴讀必聞雞躑躅初離
屨飛騰乍踏梯駭機俄蹈險累汝共含悽未是無家別
所悲失路迷旅懷差慰藉朋好仗提撕藥裹經時斷詩
囊到處攜遠人魂夢擾怪此信音稽早勢焚如火租收

賤似泥急難輸戶稅貧莫乞鄰醯女大憂釵釧孫饑缺
栗梨停棧雙臂痛聞跋損濕枕兩行啼霜鬢元應換春
郊綠又齊卑官甘放廢元惡待屠剗何日還初服先疇
傍舊溪向曾力稼穡今是一蒸黎麥熟雲連畝秧抽水
拍隄釣筒收鯉鱧菱線亂鳧鷺上壽偕兒子傳餐侍小
妻人間容落托天許出顛躋老健無須杖安榮勝執珪
循環有反覆轉轂見端倪雪暫留鴻爪秋當試馬蹄漫
教傷契濶先爲寄封題

柳枝詞二首

新綠搓條軟勝絲人前迎舞鬪腰肢無端也被春風折
却愧青松傲雪枝

紺寒亭詩集

卷三

三

鞦韆架北畫樓西籠却笙簫白晝迷昨日池塘歌舞散
黃鸝飛過別枝啼

庭中丁香一本爲人畜所損課役夫塗以堊塗用
故蒲蓆裹之以四韻紀其事

生理看猶具於人力可施瘡痍如在體襁褓似收兒繁
盛花千穗艱危命一絲始知枯樹賦不爲得春遲

翁歸來

叢篁春翠密干簣疾雷抽筍過三尺山妻手捉長纜行
嬌女稚孫相扶掖山妻悵然遠人憶阿翁愛此籜龍食
聞道京師此味珍阿翁欲食何由得屈指離家四寒暑
卽看竹亦枝柯易鄉書曾報歸期近轉眼新年春又盡

寄語阿翁歸乎來有孫今已長如筍

蓮子苦

陂塘不養魚養魚足獫獪不如種荷花千枝萬枝發上
年旱涸陂塘廢白藕出泥如人臂今年故根發新花映
日蒸若聞風霞江南六月嘗蓮子薊北此時亦入市家
人手擘香透指旅人口嚼寒冰齒蓮子甘甘如飴蓮子
苦知不知南北分嘗心各苦阿翁未便告阿姥

同西溟研谿他山聲山西厓友鹿道泳集東江寓
齋文讌分得龍字

儀部官清暇花朝客過從侶能羣野鶴句共探驪龍袞
袞風生座遲遲日下春得交天下士淪落亦遭逢

紺寒亭詩集

卷三

三

題畫冊

誰寫清江晚烟霞恍故丘梳翎小鳥倦照水一花秋筆
理通神境鄉心落遠洲採芳竹墅外何日寄扁舟

雪中集陳子文戶部齋卽事二首戶部前見招以
他冗未赴戶部意弗善也故次作戲有諾責之句

仙郎儼直下清班詩社風流數往還雅集開尊同北海
雪牕共客對西山鼎彝盡出商周舊人物都如晉宋間
自是先生能好事不關小地一官閑

唐人稱吏部郎爲小地
唐天戶部郎爲小地

比鄰地隔一牛鳴曲巷泥深信馬行折簡舊曾煩諾責
急程緣是赴尋盟停雲有待心傾久今雨能來眼倍明

補貼從前期後會西郊紅杏照春晴

題殷彥來歲寒吟卷一絕句

新詩鮮豔比芙蓉珍重公卿有報書俸薄平原方食粥

數行已筭是瓊瑤

殷作饒歲詩致諸公有和其詩者故云唐昔京官俸薄顏魯公刑部尚書

有舉家食粥之帖

讀晚唐人詩集題十韻戲做其體

舊是吟來熟新如見未曾迎眸濃可染沁骨爽于冰秀
句飛騰入微言蘊藉能安章字妥帖拔俗氣憑陵嚙去
含宮徵揮來中準繩稍嫌逸足騁轉覺碧空澄意與元
機會階難躡級登玩常銷蠟炬鈔敢惜溪藤世自矜高
步吾今最服膺庶幾窮日力猶可得師承

紺寒亭詩集

卷三

十四

爲項霜田題讀書秋樹根圖

斯人負逸氣放曠類嵇阮科頭坐樹根託寄良云遠顧
乃手一編對此秋容晚當其會心處亦不在書卷羈禽
返故林牧笛下前坂天宇渺無垠但覺秋思滿此意不
能言知者蓋已罕

輓趙晉襄侍御

麻城有善政戊辰歲有守城功

豈徒一邑頌神君風節還兼膽略聞京兆猶傳桓典馬
睢陽不借賀蘭軍名爭日月垂青史骨返湖山葬白雲
著述千秋龜鑑在後生好爲錄遺文

送納言勞書升先生省親還石門

詔許清卿省覲歸春晴嵐色照驂駢廿年捧日層霄上

萬里看雲一片飛，逮養有親此願遂。乞身未老古人稀，
聖朝豈便遺簪笏。還看斑衣作袞衣。

三月旣望同慈谿，姜西溟長洲惠元龍海寧楊顛。
木杳夏重陳子文楊次也仁和錢石城項霜田全
椒吳永年武進錢亮工嘉善柯南陔泰州宮友鹿
溧水狄立人同年太倉唐東江興勝寺看杏花限

七言古體

長安三月氣清和，晴雲捲空白于羅。郭西杏花有宿約，
花神恐笑人蹉跎。出郊聯作同隊魚，凡十五人肩相摩。
我與姜侯怯騎馬，果下小馬等橐駝。手抱鞍橋歌側坐，
平地枹杙皆驚波。錢侯宮侯都部署，後入興勝先摩訶。

紺寒亭詩集

卷三

五

先至摩訶菴有微候占此不得入

戚畹張筵擁聲伎，甲兵闌楯呵誰何。

撥馬紆迴到興勝，入門苔徑松杉淨。心地空明肌骨涼，
禽鳥無聲一聲磬。寺僧前導雙扉啟，萬斛春光一夜迸。
花氣初酣發紅暈，耀眼生花光不定。火齊欲吐藥珠攢，
海棠雪梨相照映。虛堂四敞鋪地衣，層臺百尺開天鏡。
山嵐環疊插翠屏，花霧溟濛浮玉甌。行厨遣騎已策應，
分曹酒政儼軍政。雄談眼底空千秋，真宰亦爲助吟興。
枝頭未開忽盡開，詩人筆與化工競。城市馳逐真營營，
鈿車徹曉若雷轟。猶幸此花不世情，閑此百畝無人爭。
長安此地看花好，此地看花須及蚤。人自匆忙花自開，
不見種花僧已老。湯查二子病潦倒，不預此遊知懊惱。

回頭爲問寺僧道每年看花幾人到

西崖聲山兩同年以抱疴不赴約

送同年王宗玉之任平湖

王武進人

雙鳧飛入萬花叢百里春城圖畫中俸薄惠山先載水

裝輕笠澤好乘風箕裘家有尚書履

宗玉遠祖太宰文肅公天順成化間

名模楷人傳御史驄鸞鳳于今原得地卷阿行集碧梧

桐陸稼書先生邑人也故有模楷之句

其二

半載聯床話夜分燕鴻南北恨離羣彈冠結綬吾何有
戴笠乘車古所云訪舊宿春三日糧尋秋閑釣一湖雲
青芻白飯都無用細雨檐花再論文

狄庶常立人約三月二十八日同諸子海棠院看

紺寒亭詩集

卷三

三六

花以花謝不果行是日鄭宮諭肇修先生招同劉
司業宣人陳掌坊謝浮兩先生飲胡氏谷園

薰風扇朱夏園卉吐華滋南北異物候怪此暄妍遲側
聞祇樹林爛發珊瑚枝豈謂夕露實倏已朝英披心賞
乖夙契神爽弗爲怡鄰墻得廢苑雜花垂葳蕤長者折
柬召杖屨相追隨芳徑散餘綺高槐蔭成帷弱羽弄好
音輕鱗漾文漪勝友簪組集良讌尊壘飛談諧寡俗韻
接對皆天機去彼乃適此睽合寧所思清馨襲衣袂永
日亦忘疲出門望西嶺杳靄含斜暉

三月晦日狄庶常立人邀同諸子遊賞高陽相公

寄園

猗嗟數君子藝林稱雄霸筆底奔波濤風雲隨叱咤鄙
人朽鈍姿材器豈匹亞今年吟社舉首春已涉夏徵詩
如責逋看花日不暇相國平泉莊乃蒙片席借複道繚
垣通曲塘危梁架臺層瞰樹杪藤根穿石罅遠嵐淡若
無密蔭濃欲瀉名酒珍珠紅新出糟床醉決鬪各分曹
其意欲凌跨豈有尚書期亦無官長罵詩豪縱酒狂一
若觀于蜡姜唐最老成風神獨醞藉我亦歸二老謹避
退三舍所怯酒戶小逸興堪方駕緬懷古哲人秉燭恒
逮夜昨者海棠院芳華又凋謝相國裔孫賢猶保此亭
榭花陰晷未移落英撲檐瓦吾輩逢勝場務此極歡罷
明發莫催詩宿醒且乞假

紺寒亭詩集

卷三

七

同年何倬雲戶部招同諸子看藤花

尋花到處似搜牢折柬開尊快所遭跨馬喜霑微雨濕
入門突見紫雲高竇收鐵網千絲絡機織水蠶五色纒
席上聯吟詩句好恰逢何遜在郎曹

送同年馮敬南任梧州郡丞

萬里南行莫黯然江山能助筆清妍官程寒帶三湘雨
詩派遙傳五嶺天回首鳳池霄漢迴關心鶯谷曉春遷
治中暫借才賢重不比潯陽夜泊船

初夏得絕句二首

侵晨微雨過庭宇若新沐樹色透鄰牆送此一簾綠
未知新月上檐前一杯酒忽見杯中影月痕落我手

送同年范筆山出守延平三十韻

四明范先生老成具風格淑質秉貞亮束躬寡缺失胸
無塵土翳語皆肝鬲出其發爲文章元氣裹鬱勃蛟螭
挾風雨爪鬣恣撐突一範于規矩指不離經術曩者上
春官羣彥輻輳集一百五十人先生文第一主司互傳
觀滿堂皆歎息文苑得斯人爛然增氣色民曹小司馬
兩俱清要職然以處先生猶嫌小屈抑奈何刺遠郡須
此文章伯先生不謂然浩然中有得內外服王事義不
容別擇州將非龕官方岳寧舉秩身旣親百姓地况領
七邑龍津落驚湍山峯環劍戟物產云豐饒民俗聞悍
急所務布慈和亦宜持強直意在興民利先去民蠹賊
紺寒亭詩集

卷三

三

意在風官廉先除官貪墨學豈章句爲文正以經國漢
家數賢相多起二千石矧茲溪山奇亦足發筆力從此
八郡人爲文有法則賤子視先生于分尤親暱同出梅
直講師門分半席可許退食餘共此登山屐不但陪燕
遊用紀公勲德

送同年鄭禹梅出守高州并問訊同年茂名令王

令詒

廣南星氣分牛斗山勢戍削水清瀏瑋瑁珊瑚孔翠羽
文木珍香無不有但恐文教遜中原未得宗工開戶牖
潮州曾識昌黎韓柳州又見河東柳天教騷雅變蠻荒
特出朝廷著作手寒村先生一文匠耳白過面今歐九

人清如鵠氣如龍筆端落紙雲烟走自出杼柚挾叮咛
盡剝皮膚掃窠曰已離水署歷郎曹又建隼旗作牧守
先生利器迎刃剖如遇有間入無厚燕寢凝香鈴閣閑
妙緒直與化機紐文瀾萬頃演漲開千載能繼古人後
况是遭逢勝古人拔擢本出廷臣右一身官居四品尊
雙親年登八袞壽父祖子孫自唱誦衙齋此樂豈有偶
青浦王子同年友僚屬相承聯臂肘政術文章相擊扣
他年徵拜共還朝合璧都爲一集否

白燕詩爲合肥相公作

時相公方宅晏

王謝堂前故壘依穿檐忽訝是耶非舞衫乍失斑斕彩
珍羽皆成縞素衣孝水點時增潔白相麻映處亦光輝

紺寒亭詩集

卷三

三九

異徵他日垂青史應繼包公起合肥

包孝肅
合肥人

送同年吳青聲之任祥符二十韻

豫壤臨中土坤輿據上游蜿蜒聯嶽勢環帶束河流赤
縣股肱近黃圖指掌收廣輪踰百里綱紀領諸侯行省
旌麾駐通津冠蓋稠未能辭况瘁亦易困誅求重地需
高選斯人是拔尤視躬風檢峻涉筆綺霞羞汗血初馳
坂奇毛乍脫鞴政和宣惠愷才捷釋紛糾廉白同米皎
剛明濟水柔閭閻依大廈臺府借前籌燕坐香凝寢開
觴月滿樓彝門古蹟在梁苑秘思抽指日飛雙鳥他年
擁八騶河橋今折柳山驛正噴榴遙翠勻螺黛征軺護
碧油故人方逆旅官署漸新秋雜佩勞投贈郵筒未阻

修簿書倘暇逸詩句待吟誦

古鼎圖

其青若翠羽其丹若雞冠三足上承跗兩耳可貫環欵
識無年月當在夏商間吾聞昔大禹鑄鼎辨神姦臆魅
破膽走不若不敢干誰爲貌此圖猶見色爛斑光氣方
豔發慎莫輕傳觀

紺寒亭詩集

卷三

三

紺寒亭詩集卷三終

嘉定趙 俞著

同年王木伯注選得湖南之綏寧令意若有不釋
然者賦長句贈其行且以慰之

君不見陽林日暖土豐肥樹未十稔已十圍輪困液滿
速朽腐厥質不中斤斧治又不見于尋柵樹生陰岡危
峯絕壑相低昂根柯磊砢鐵石强大匠乃用作棟梁吏
道于今稍稠濁注銓未盡奪科目朝家俾汝司民牧豈
可居官但食肉王子西秦卓犖才筆與灞澆同奔放氣
共終南太白爭崔嵬接對令人鄙吝釋恍若春水融東
秋爽開謁選乃在衡山之南桂嶺北萬峯環挿溪澗洄
紺寒亭詩集 卷四 一
枕榔椰子充廚傳豬都能館伴衙齋山城僻遠地磽傭
得無紆鬱傷胸懷嗟乎人生歷境不必皆膏腴腸胃脆
薄腴理疎漱滌清泉弄白石礪汝骨幹勝馳驅君材自
是天廟儲豈肯蔽芾同薪樗當今 聖人真有道明堂
辟誰方營造干霄大木故應少上貢闕廷知及早風霜
冰雪慎護持當爲天下重此寶

家二聞以僉憲分巡兗東詩以贈行俯仰今昔慶
茲遭逢且申情愫故復有末章之二云

口銜天憲壓諸侯都水監司管鑰收一柱障能廻二瀆
雙旌遠直控三州宣房宮束桃花浪太白樓開茵菖秋
况是君門親舍近長安只在五雲頭

新又堂開憶戊辰

寄園中堂名戊辰三月十年往事好作給諫公初謝政時也

重論昔逢牛李參商日

今是韋平嗣續人
青瑣風霜存舊草
紫泥雨露沛新綸
吾宗天水根株共
可許欣榮也

得春

送同年侯蘭公之任資縣

賤子孤窮如趙壹
多君俠烈似侯嬴
肝衡論事須肩動
感激知心涕淚橫
薊酒一尊傾祖帳
蜀山萬點送官程
東川寄語蒼溪令

謂錢子道我吟多太瘦生

送家慎齋之任安義四首

遠赴南州戒首塗
蕭然襪被一琴俱
到官莫厭齋廚薄

紺寒亭詩集

卷四

二

彭蠡平吞萬里湖

五老峯前江似帶
滕王閣外月如環
鄒邦南北相唇齒

南昌新建武寧德化新任皆同年安義居南北之中

君在廉泉讓水間

幕裏蓮花照水開

門人張天林為掌書記

登樓嘯咏共銜杯
三年

最績朝天闕
挾得關東客子來

宗人同榜推才俊
武進新河兩不羣

戊辰同姓四人常熟聖傳物故今只

三人慎齋新河人武進今沁水令侶臺也

愧我衰遲岑寂甚
廬山為寄一囊雲

雲

送同年張魯生之任高明十韻

桂海雲天末
春州嶺嶠間
驛程雖悵遠
王事未投艱
課蚤秋先辦
風淳古易還
經時稀案牘
出郭看溪山
瀑響

春琴筑峯攢疊髻鬢舊坑鸚鵡眼文木鷓鴣斑地出端溪石鐵
木自是民豐阜何愁吏曠瘵銀章行晉秩玉筍舊同班
話別情難剖論交分未慳旗亭方繼綵谷鳥正綿蠻

送同年房湘崖之任萬縣

黃牛白馬漲難消百丈牽船上九霄襟帶長江盤水口
彈丸小邑插山腰親朋餞少知官冷僮僕裝輕是路遙
却喜邊州吏事簡政成容易召還朝

常少宰尊人雙壽詩

常又兼翰林院學士

昇平垂奕葉英哲挺魁梧鸞鶯騰儀采麒麟上畫圖勳
原追賈鄧族欲壓崔盧戟列朱門峻章懸紫綬紆珪璋
傳國器霄漢躍天衢身比千年鶴人看五色雞銓衡周
紺寒亭詩集

卷四

三

少宰領袖魯諸儒門盡登龍舊庭還效鯉趨瓊林花四
映旭日樹雙扶象簡文犀鈿魚軒夏翟綸臣清真似父
婦德一從夫滋味楮梨並調娛琴瑟俱芳辰欣設帨同
甲近懸弧舞袖翻鸚鵡歌喉響鷓鴣池紅浮菡萏酒綠
挿茱萸客人操鳩杖孫嬉採蠟珠榻爛傍帝袞珍錯出
天厨寵異宣優策儀同筦要樞德門繁祉集聖世渥恩
殊永錫人難老徵祥事豈誣

康節寓齋看芍藥歌同西溟東江研谿查田聲山

霜田六謙文子倬雲赤圻諸子作

主人愛花住花市圍戶裝送如輸租後圃前除無隙地
入門爛若璣瑜鋪主人愛花又愛客庫中貯酒常百石

退朝尚未解朝衫座上賓朋已脫幘對客看花笑口開
不計郎官月俸入一日不飲不看花自言何異魚離濕
京師四月花事集芍藥羣芳稱第一豬膏膩白猩紅殷
高者起樓大徑尺主人不欲走馬看欲使邸第繁盛成
巨觀大車小車捆載得頓覺豐臺千畝春闌珊定州白
玉磁湘江斑竹闌霞蒸霧涌萬朵攢髣髴丫頭花面堆
風鬢主人特出南酒治豐膳決旬召客皆分班今者詩
人海內士名輩不必定尊官一觴一詠有高韻丰格直
如晉宋間主人無錢性不慳主人官忙性好閑賓主相
看兩不厭名花相對追清歡豪家不少看花客如此風
流良亦難

紺寒亭詩集

卷四

四

贈金汝砥

官詹事府錄事家洞庭山

吏隱風流繼昔賢秀眉黃髮及耆年薊門烟柳聲華地
林屋巖扉洞府天管領湖山原作主徊翔京闕當遊仙
宦成倘憶滄洲趣吾欲隨君上釣船

乙亥六月座主宛平相公具疏乞休以耆舊大臣
方殷倚毘不允所請明良一德致茲隆理齒未懸
車奉身思退顧乃睠念忠勤用滋禪補君臣恩禮
近代罕覩忝附門牆與被榮寵恭紀盛事以備珥
筆者採輯焉

三公坐論道不共百職列萬幾從此理四聰由茲達古
者難其人無人官則闕後或稱令僕名實云滄雜國家

設六曹庶務既鈐轄內閣象三台常用贊密勿制蓋做
周官事皆應古法相公命世英志尚卑管葛不矜已技
能務汲引才傑不形喜愠色度量包闊闊坐致清和理
削平三孽彙躬逢 堯舜主言無不聽納凡有所助勲
潛機嘿開豁退不尸厥功禁中語不泄山嶽出雲雨潤
澤在萬物不能言所利無可見施設年力雖逾耆臣精
未耗竭飲啖猶雄健視聽極清澈念久柄鈞軸功成奉
身乞前者具疏陳情詞吐剴切汝惟一个臣尚詢茲黃
髮 王言霽如春來章勅斷絕今茲夏令屆溽暑蒸濕
熱忠勞所鬱積小覺病痛發拜俯滯屈伸自謂腰脚劣
沐浴具衣冠再疏申前說臣願糜踵頂臣衰減毛血中

紂寒亭詩集

卷四

五

書政根本典司王喉舌 聖主優容臣臣戰懼隕越

帝曰吁咈哉遣官傳詔答汝世篤忠貞汝蚤侍 禁闈

世祖章皇帝廷臣汝簡拔遂留以相朕四十年一節

汝尚未衰遲汝益加護攝平章軍國重不以煩瑣屑五
日赴都堂休汝筋力乏公拜稽首受仰視 天顏悅虞
廷明穆交殆于今爲烈彥博呂公著方茲良已蔑當公
引疾時舉朝氣爲奪奈何樂烟霞不上扶日月朝則有
大疑於誰乎剖決遠近頗亦聞謂公若是憇何不留政
府公豈不我活及公出視事中外歡聲徹景運際隆平
邊鄙皆寧謐人物育其間無疵癘天札邇乃汾晉災亦
傳吳會溢 聖世不爲沴予辜若已撻行見和氣蒸天

心將轉幹調燮功用全大化無漏缺曰寅亮天地作六
卿表率請爲社稷留請爲蒼生出相公營邸第仙靈一
窟穴巖岫通杳冥軒牕迎月雪郊墅東山莊花藥繁如
纈未暇自娛嬉四海想饑渴後樂先人憂芳躅追前哲
欲遂林泉遊他年臻耄耋盛事今所稀史臣備採掇
康節出宣德紙作畫見贈因題三絕句用酬其意
坐覺林巒烘染勻溪藤潑眼墨痕新先生妙手天機會
能使枯株再得春

自愧無成成懶散如君宦達亦蕭閑要知彼此忘言意
相對長松片石間

矜貴尋常不爲通百朋特爲慰途窮邠卿珍重題年月

紺寒亭詩集

卷四

六

正在孫嵩復壁中

送查夏重遊大梁時考取中書舍人夏重不就考

輒行

君來雪作花君去秋尙暑君昔來何爲君今去誰主問
君君應不自解瞪目注視無一語君不見中丞

餘杭官
嚴公

坐御史府廚傳無烟空轅釜中書舍人况枝官其在先
生又何取眼光當出牛背上羞與傭保雜作伍一鞭月
黑蘆溝曉行囊半卷新詩稿瘦馬獨吟秋色老蘇門林
慮挿晴空吟興聳身入飛鳥繁臺梁苑久無人要待先
生發文藻所惜吾徒多潦倒詩社推君長句好今朝祖
餞唱驪駒四座相看色懊惱嗟君此去苦亦樂座中有

客雙淚落君今四海多逢迎我今一身暫棲泊看君南
出廣寧門何異雲鴻上寥廓冬春倘得脫樊籠訪舊亦
期向河洛君能遲我梁宋間便欲與君訂夙約

康節作畫竟爲題董文敏舊句有不把聰明持贈
君之語復作三絕解之

雨餘石徑淨無泥竹樹平岡不厭低便欲移家來此住
此中聞道有愚溪

分君才藝真能了乞與聰明些子兒剩有癡獸堪報答
投桃未是失便宜

人如錐銳我如椎人盡雄飛我伏雌檢點平生亦定分
東家未許學西施

紉寒亭詩集

卷四

七

贈嘉定新令

吳儂此日快遭逢豈但循良一魯恭如早望雲能作雨
若苗有莠最妨農萬間厦廣叨安宅百鍊剛成正及鋒
聖主方求強項令巖廊會見策勳庸

同年何倬雲戶部以畫扇索詩爲題絕句

極天圍處萬峯環觸撥鄉心髣髴間記得吳儂霜落後
橫塘橋外看西山

自檢詩稿因題

興到詩成信手拈苦吟轉覺意難厭還嫌棘澁同菱刺

梅聖俞詩苦詞未

圓熟刺口劇菱芡那便中邊似蜜甜

蘇子瞻論陶柳詩
如人食蜜中邊皆

甜米乍春時篩未得

用傳燈
錄語

丹非熟候火須添自知仙

骨何由換欲進真如上竹鮎

王瞻形應考中書至京以不得與試南還作詩送之得二首

千里承 明詔其如格所司豈知鴻鵠志不惜鳳凰池
秋賦充應首春官上未遲遙期一載後我去又何之

夙昔相期許平生願未乖霜蹄終奮迅劔氣不沉埋我
得翻非福君遲正復佳文章能問世畢竟在吾儕

王麓臺都諫以畫擅名當代矜重不妄予人查季
廉夏重贈詩一章王遂以畫酬儀部唐東江和其
詩謂不宜啟此例便令斷後余甚不然之爲破其

說依原韻呈一首

緝寒亭詩集

卷四

八

翁子日下直坐對蒲桃架名畫共品騰微茫參造化吳
中舊手誰太常宗伯亞都諫得家風高如並太華特賢
今林立都未追逸駕氣格分雅鄭純駁辨王霸琬琰不
易求匪但日不暇倘許尺幅賜合以綺錦藉翁畫亦偏
古氣乃肯相下孝廉五言呈遂爾百城借詩老畫筆蒼
彼此互驚詫巨能包衆壑細至無一罅循例將陳請韻
險吾未怕好事古罕聞風流見亦乍儀部飽炙人不使
人知炙載書申厲禁壁厓許田假用意良不惡欲重先
生價息壤旣在彼寧以拙劣謝稍能窺妙理吾或非田

舍

送友佐戎江寧

南出桑乾指蔣州雍容裘帶最風流龍潭月曉千帆影
燕子磯寒一劔秋名勝登臺堪作賦太平無事覓封侯
吟訓好仗郵筒便烟水微茫憶舊遊

題荷花畫扇

初日迎眸秀可餐孤標擎出蓼花灘世情誰似濂溪叟
敢把青芬壓牡丹

虞山黃尊古于扇頭作松雲疊障圖

清欲寒肌骨悠然對壑丘瀑懸千樹杪雲上一峯頭昔
憶扶筇入今思閣枕遊十句恐未徧尺幅已全收

自五月至八月苦霖潦中秋夕忽開朗月色浸庭
中如積水蘿軒戶部席上作

紺寒亭詩集

卷四

九

西山雨氣勢欲吞畿南畿北白晝昏陰雲罩樹未撤幔
飛瀑注簷還翻盆十句幸一澄夕霽五更俄已失朝暾
龍舟簫鼓旣銷歇鵲橋星漢尤沉淪一年佳節復有幾
坐此不樂心煩寃屈指中秋最新爽年年對月開尊賞
今年人意却徬徨正爲天心難倚仗朝來白霧漲烟濤
頓起狂飈振林莽天公面目久埋藏特自主張一掃蕩
碧空一片磨青銅山缺水輪已湧上澄澈萬象見秋毫
始覺四方上下廣槐椿疎翠印前除菱苳交加水滉漾
主人命酒集高朋急管繁絃發清響林間鳥鵲忽徘徊
隱際花枝乍俯仰開簾人醉月當頭月亦隨人欲墮掌
人生佳景須歡娛對此不歡計則愚聞道江南苦淫潦

湖波十丈溢，區燕吳千里。共明月，能得清光似此無。
送周明揚還吳郡周忠介公孫時與羣從乾益偕

行

客中送客黯銷魂，半載襟期酒一尊。謝氏風流兄弟並，
楊公清白子孫存。言領肝膽矜同調，思入毫芒許細論。
曾以所業屬余點定剪燭西牕知不遠，明春歸定過吳門。

虞山周乾益謁選郡倅，需次南歸期以來春到都

詩以爲別

宦遊行欲駕驂騑，文譽年華比陸機。鵬翼猶爲六月息，
鴈羣且作一行歸。及探吾谷霜林晚，莫戀東吳蓴菜肥。
轉眼故園春事蚤，鶯花晴色送征衣。

紺寒亭詩集

卷四

十

題畫幅

麋鹿呼羣飲澗濱，樵蘇徑斷鎖松筠。巖棲定有高閑者，
世外還應著箇人。

結交篇爲忠介公孫周明揚忠節公孫魏超宗作
緬昔乙丙間，椽人虐焰熾。緹騎出縱橫，忠良皆逮繫。魏
旣檻車徵，周弗鼎鑊避。吳民激義憤，隕頭拔毛易。當時
物論歸二公，尤完粹。往事今百年，父老猶涕淚。兩姓迄
三傳，家風不失墜。茲覩兩裔孫，波瀾故莫二。一如解條
籠，一仍謹銜轡。清俱璠璣姿，重皆鐘鐻器。雄文驚駘宕，
直已羞廡媚。肝鬲傾素心，須臾餘勁氣。以此想前徽，髣髴
髯知肖。似吳俗，嗟波頰紛營榮利嗜。有若兩中表，目中

見亦未業能世其家蓋亦有天意公卿滿京朝顧誰能
賞異二子不以屑浩然天地際所取繩先烈不在各位
貴人生三不朽立言已云次芳規豈外求彼此相鏃礪
驚鈍如鄙人可許共把臂

奉呈阮亭先生五首

大雅今誰屬扶輪有鉅公體兼六義備氣得五方中俯
視羣山小孤行薄海空頽波重復古手障百川東

穠豈沿温李蒼非襲杜韓光芒涵不露神用出無端鼓
吹唐虞盛包羅海岱觀漁洋徑路絕何處步邯鄲

漁洋山人集

高名鮮貴仕公獨歷公卿地肯脂膏潤身非綬冕榮詩

紂寒亭詩集

卷四

十一

工官自達人淡句同清此意真凌跨千秋不敢爭

夢想風儀切今茲薰炙親躬逢名世者驚見謫仙人島
國傳圖畫天朝比鳳麟泰山幸咫尺對此玉嶙峋

鯁生性魯鈍况又辱泥塗創憫檐前雀恩推屋上烏

主鄭司寇時向先生稱
及余先生每謬賞焉豈徒勞齒頰還冀入錘爐三昧

宗風在詞門許達無先生有唐詩
三昧之選寄園十詠爲家給諫恒夫公作六言

狃青閣

黛螺疊出千層雲樹看成一抹牕虛作勢可吞山動飛
來欲活

無波艇

塵世風濤匝地茅齋安樂成窩所遭雖動不動縱然有
波無波

新又堂

劫後園亭無恙庭中卉木皆春持節正銜新命賜環尚
有舊人

見心亭

隨時應物皆在何必老衲同叅叟杖巡檐有會圓月影
落前潭

獨倚樓

置身天半極高放眼秋空亦大意中欲覓可人宇內未
知若箇

紺寒亭詩集

卷四

十一

拄笏軒

曾此伏蒲畫地于今凭檻支頤青山排闥知己白雲出
岫有時

鶴臯

健翮踴躍掠地圓吭嘹亮聞天帶箭還山往日銜書赴
隴今年

瀉玉

鏘鳴環佩有聲蕩漾淪漪可愛家有紺寒小溪余家有
水亭名
寒綉綉源當出一派

雲臥

峯頭縹緲一絲松頂氤氳萬狀夢中冉冉雲端捧日又

來天上

超臺

登眺未踰闔闔高曠自出樊籠若欲別求世外便是猶
落寰中

壽高少詹

二十二韻

代

蓬島真仙府璇霄上帝居誰爲香案吏來校石渠書太
白星精出松高嶽降儲茂醇追董賈綺麗奪應徐祕殿
雞棲近清階鶴禁除便蕃榮錫馬褒寵特垂魚密勿諮
詢及賡酬燕賜餘手操劈正斧針借指南車出不言溫
室休還宿直廬賢勞看日懋忠悃得時攄倚注高齋舊
綢繆晉晝初納行百揆宅擁具八摺輿報國弘儒術娛
親有孝譽大篇傳琬琰問宇集簪裾蟬冕尊原絕龍門
峻不如樗材非所用粉社久相於地屬喉唇要言寧齒
頰虛疎慵蒙茹納蕪塞費耘耨申甫昌辰屈唐虞化日
舒物芳萸應節客賀屢填間竊幸叨榮問惟宜頌樂胥
樸殊慙斧藻珍自愧瓊瑤

頌京江相公母何太夫人

鐵甕雙峰峙銀濤萬里蟠江山相枕帶氏族舊衣冠慶
已綿三世尊今總百官卿材家譽早庭訓母儀端飴蜜
祇承肅輝庖撫御寬齊眉食舉案和膽課嘗允淑德生
申甫清風比孟桓一夔方簡畀五鳳盡飛搏宣力分勞
勩陳謨劾責難始終一節白夙夜寸心丹申儆機猶績

持廉鮓自乾服章八命錫珩佩六宮看環海爲霖徧層
霄濃露溥秀林交蒨翠慈竹覆檀欒福祿純休介期頤
聚順懽拂簷碧漢瀉入座綺霞攢仙果傳鉤盾天府賜
醜盤羣公皆祝嘏上相勸加餐齒未凋顏鬢身疑插羽
翰恍追蓬島宴不數板輿安竊附通門契羞因結綬彈
雲泥時溥落枯苑跡單寒欲晉登堂拜還同坐井觀敢
叨蔭似樾但沐氣如蘭

種菊詩爲翁蘿軒賦

百卉含華滋紛然雜紫綠厥類各品殊各各抱芬馥昔
賢性所欣殆亦意偶觸淵明淡蕩人高亦不在菊物論
易拘墟便謂斯人獨孤山或種梅子猷曾看竹當時意
紺寒亭詩集

卷四

十四

云爾非必嗜好酷夫豈格韻標而顧藉草木士苟矜風
尚牡丹亦療俗蘿軒才器雋利切藍田玉能撥曹務忙
靜對清于鵠終日蒔花藥砌下繁英簇自引連筒澆手
捉長鑿劔芍藥初藏根菊枝又繞屋曉露映疎簾庭戶
成麗矚畫筆入逸品潑墨作巨幅雖處市朝喧趣若棲
巖谷擾擾長安塵別自出睂目斯花對斯人比况良不
辱隱逸誠堪怡富貴亦可欲先生位置間兩者將焉屬
登堂濟其馘內觀理澹足耳食每膚論所見則已楷佳
辰霜未繁糟床酒正漉賓朋折簡招重茲勝遊續花神
嘿相賞幽意如可掬長年對此花共分此清福旣爲先
生評卽爲先生祝

九月十一日值其生朝

送項霜田還杭州

君不見渥洼水生汗血駒不列天閑驂鸞輅乃在太行
之坂負鹽車又不見豫章千尋大蔽牛偃臥無復工師
求風水剝蝕沉沙洲天生殊尤天不惜令人扼腕三歎
息咄哉項子人之特腰帶十圍身八尺眼如望羊口懸
河胸有五車富學殖筆掃千軍弓彎五石真可下馬草
露布上馬手殺賊何不使之簪筆直承明黼黻宗廟潤
朝廷不然亦宜揚威萬里制一道開府建牙總征討激
昂鬚眉露鱗爪奈何長途蹶躄色枯槁上不能取公卿
下不能博科第儒冠襍馘風霜老即今南征策蹇驢雁
聲嘶壓槐柳疎放舟兩峯夾西湖自吟自嘯山月孤男

冊寒亭詩集

卷四

十五

兒四十功名未成就那肯負此瓌姿瑋器守菰蘆天子
當今開弘文須君高文典冊煥星雲又聞推擇大吏鎮
邊州亦可腰懸金印覓封侯嗟乎天生大材豈淪落埋
藏光氣終騰躍莫謂世無匠石無伯樂

虞山黃尊古善畫索贈詩得漏字假字

畫水波淡施畫山峯峭聳秋空天次寥春到林蔚翳闊
若劈巨斧罅若披細氈妙手通神解要在氣韻動素壁
掛生綃樹石波瀾涌見者耳目換栗然肌骨悚須知元
化始發生有根氏胸中具結構揮酒中條理拙工求形
模所辨在生死子旣造深微默能契厥旨吾非知畫者

臆說聊復爾

吾行山谷間，烟景皆可寫。林巒鬱窅，靄流激湍，瀉世人不好真，乃復求其假。尺素等球圖，不吝百金捨。云愛骨格似馬，終非馬。旣以真故，好圖寫奚爲者？正爲抒胸次，筆韻發瀟灑。醞釀書萬卷，于此吐風雅。今將論畫意，與君結吟社。去探奇絕境，並馬西山下。

送同年盧認齋之任懷仁

嶧陽產琴材，其響應宮徵。惜哉天廟器，乃不充任使。雲中古阨塞，城堡近邊鄙。飛狐萬峯環，彈丸落谷底。先生驅車行，不以介憂喜。設官作人牧，事匪專利已。壤地云僻瘠，展布將在是有民。可拊循，我父汝我子。有士可師，率我長汝我弟。嗇故俗，不澆剛。乃姦易止，豈必鄒魯邪？

紺寒亭詩集

卷四

十六

而奏風化美，先生惇友誼。痼癩如在體，憫我顛連。故常引爲已恥，以此保蒼赤。夫寧隔膜視，次第觀政成。期月而可矣，羽儀上闕廷。吾當拭目俟。

送同年楊慎齋之任光山兼問訊祥符吳青聲

君名起嶺嶠，我跡滯燕臺。卓犖今無匹，輪囷老不材。潤常加煦沫，蹇乃惜虺虺。爲倒囊中粒，偏吹燼後灰。三年曾未倦，萬里是重來。出宰推儒術，名邦得賦才。楚山濃帶雨，汝水駛奔雷。俗使僉荒換，春從星紀回。行徵作楫，用不次積薪。催自歎鷓鴣，寄還防鷹隼。猜舊交猶剪拂，故物復胚胎。卹便追霄漢，空知仰斗魁。天看中嶽近，地出大河隈。爲語祥符令，何時共舉杯。

送同年劉尉公之任靈壁

劉魏環樞先生同里做落向及之古以贈語之

義也

匹馬淮山指斗墟平生蘊積一時據駭機乍出驚弓後

劉近爲州將所窘辱

製錦今看游刃餘仙吏風流應拜石官廚廉

白有懸魚

邑產奇石潭多魚

魏公鄉望君能繼前後勲名可得

如

初冬

尚涉初冬候俄驚朔氣催月穿檐似雪風入樹成雷瘦竹槎枒立寒花勉強開包含春意在即此是栽培

題畫竹

拂梢已挺干雲勢倒地俄成壓雪枝知是畫家逞筆力

紺寒亭詩集

卷四

七

此君摧折不禁持

查聲山湯西厓二編修同時遷居椿樹巷過訪之

見兩家圖書皆插架喜而有作

此生不恨蹉跎一官晚但恨讀書蹉跎不曾破萬卷却

喜寓邸閒日力補貼工夫差自勉去年儀曹東江家今

年戶部蘿軒館當其退食罷朝參共討精微訂駁舛浙

西玉堂兩翰林南里東街互濶遠車塵十丈汗淋漓一

旬未得一日歛卜居同住椿樹巷比隣不復辨鷄犬我

一聞之色飛動布襪青鞵足接踵入門未及修寒暄瞥

見縹緗萬軸充屋棟彼旣圖球陳此亦雲霧涌恍有異

采耀眼光更來古香撲鼻孔家具只此五車書囊背全

損七品俸左唐右姜前吳郎直似五星奎宿拱以我邀
遊諸老問經史子集探各種不用借書償一甌何異百
城我自擁有人問我何時一階得我方坐君齋頭鎮移
日漱滌芳甘窮幽墮揮手勿言且謝客

陸詔九所藏王麓臺都諫畫幅索題

六街塵空如漲海西山疊翠兀天外側峯橫嶺不得見
但隔城頭望杳靄先生豈有移山術寫向鵝溪絹四尺
山容夾雨石氣青瀑布捲簾林霏白危梯置級羊腸紆
老樹插坡箭箝直嵌空矮屋懸厓牢斷逕小橋跨澗立
動蕩疑是蛟龍翻陰森怕有鬼神出我見此圖適被酒
逸興亦隨山飛走先生許以詩易畫縮瑟至今慚出口

紺寒亭詩集

卷四

七

陸生得此夫豈偶萬斛雲烟落汝手一餅黃金未易求
勝賭宣城一太守寓齋展卷共臥遊不問此圖屬誰某
人間珍玩固已多何必收藏乃我有

西厓招飲阻雪不能赴

雪意浮空動衝泥怯往還尊前一席地門外萬重山旅
况真成惡歡場如此慳微吟俄得句亦足破蕭閒

送宮諭鄭芥舟先生請假歸侯官

山行曾度仙霞關水行曾下黯淡灘裂崖峭若刀斧削
危礁森若劔槩攢吁嗟乎難哉猿鳥偏仄愁魚龜雖然
此路之難未若仕路難人言長安樂西笑開心顏此知
長安樂不知長安之難令人蹙頰摧肺肝莫云山嶺峻

此間平地起峯巒莫云水湍惡此中談笑生波瀾丈夫
豈必輕軒冕九鼎亦須嘗一嚮人情未遇望貴顯已顯
又望官階轉侍從既欲兼藩輔儀同自覺卑黃散必待
功成始拂衣只恐抽身悔已晚卓哉鄭先生四十年來
擅文苑東序金鐘鏞清廟玉珪瓚官列水衡提水鏡資
勲正合升樞管天機深世機淺歸興濃宦興懶故園山
水風月寬頓覺鄉心一夜滿傾都出
雲爲點染醉吟坐嘯安樂窩所過溪山皆平坦請急還
朝有程限故園此席恐未煖先生微尚吾已喻不向人
言契者罕吁嗟乎丈夫勇退當急流富貴無常有顛躓
人謂先生高吾謂先生智他人居其難先生居其易浩
紺寒亭詩集

卷四

十九

落胸襟無一事先生此行真得志但自怡悅自逍遙莫
教長安知此味

所遭

筆墨日于役驅馳身所遭只緣吾老賤不是獨賢勞借
此消閑晷翻如任劇曹若論裨世用曾未一秋毫

同年陳煥翰庶常出宰秀水脂車待發奉呈二章
用申燕喜亦道離懷若乃義敦贈處體備勸規敬
以古賢相期或未獲戾我友平湖令君王宗玉同
志友也與秀水鄰比故問訊及之

視草鑿坡墨尚新鶯花暫別帝城春儒林此去稱循吏
王政何先在養民滿袖香攜今徧野一條水定不沾塵

承恩再入鵷班裏猶識當年侍從臣

每從京邸奉清輝性韻剛仍不我違同出陸公臭味近
况連吳郡齒唇依脫驂此日先分俸銘座忠言是佩章
政績當湖知競爽輿人聞已頌聲歸

頌袁夫人

總憲王儼齋夫人

王謝衣冠盛楊袁閎閱崇勳曾留漢代譽獨秀江東秉
哲多人傑深閨有士風熙時今際泰名世又生崧器業
包含大文章製作工憲邦尊吉甫亞相秩司空國仗忠
貞力家資贊助功貴由苗太保德配呂申公異順幽閑
性坤柔淑慎躬高堂如篤棊同室亦和衷庀政朝廷肅
推恩雨露洪清芬流女史式訓及王宮翠映烏棲柏春
紺寒亭詩集

卷四

二

生鳳集桐紫宸方簡畀黃閣且儀同匹謂賢相敵成還
代有終海桑迎曉旭庭樹發新叢前烈衣聞遠休徵食
報豐龍門叨汲引燕石賜磨礪菲祿光榮被徽音頌禱
窮千秋長鳥奕五福正中融

以詩索麓臺都諫畫欣然爲余命筆聞其將成再
以四韻催之

晴牕好拓陟釐箋面目廬山許爲傳十日定能成水石
一堂想見走雲烟若論酬直應千絹却喜新詩算萬錢
昨夜畫圖先入夢香爐峯下聽鳴泉

棄婦辭

妾本民家女結束隨時妝眷言被光寵幸登君子堂君

家盛姬媵寶髻縣明璫獻笑吐妍詞蘭蕙含芬芳妾逢
君子怒身未爇君牀入門弗問諱乃云言語傷妾身本
疎賤廢斥理亦當側聞古賢聖未或厭規防姜后脫簪
珥樊姬味不嘗妾感丘山重冀欲裨毫芒不獲申微悃
理我嫁時裳妾語誠乖忤妾意誠忠良妾去已決絕妾
行尚徬徨所希妾言用不計妾存亡但得去後思妾言
何異終身承奉君子旁

送郝鈍菴侍御致政歸霸州

知雜西臺獨坐尊朝堂舊有直聲存尚書曳履難兄弟
學士垂魚長子孫家宰恭定公爲公兄
令子子權今官翰林綠野林泉依帝
里鑑湖風月是君恩白頭人况齊眉在偕老何須隱鹿

緡寒亭詩集

卷四

三

門

塵網

文史娛嬉性所偏何緣塵網又相牽臨門督促追官課
按月關支少奉錢王福自知巧者賤宋清差比市人賢
倒懸未爲碑文誤我友能爲授一塵

送同年戴仲升之任臨邑

托契於今二十秋鄉舉同
在戊午行藏却似對沉浮朱衣入座

君藍尾青眼相看我白頭渤海賣刀風再見傅家理縣

譜新修傅瑛家有理縣譜仲升同榜
兄衣聞任永寧令新舉卓異鸞鳳自是冲天物

莫笑枋榆有鷺鳩

惠庶常研溪出宰密雲以二律送其行

斯人氣孤迥飛瀑落蒼巖筆攬東吳秀書探祕府函文
儒麾出宰詩伯帶頭銜冰雪原無滓風塵亦不凡
稅駕自茲始風流何處攀吟鞍山入郭官署月臨關草
木迎春發鶴琴終日閉朝家須著作遲汝舊仙班

題許月溪策蹇入都圖其友鄭芥舟宮諭時奉假
歸里

芥舟南去月溪來社燕秋鴻兩不猜薊北吟鞭晴雪裏
江行正上子陵臺

席上戲爲四絕句

金蟲碧鳳綴明璫全學丫頭花面妝見說長安歌舞地
春風不屬杜韋娘

紉寒亭詩集

卷四

五

懶隨檀板動朱脣珠玉無言故自珍座客漫勞親勸盞
知他眼底有誰人

容華照席綺霞羞供奉今班第一流猶爲紅顏嗟薄命
漢家故事合封侯

女三爲粲美無度人百其身死亦甘縱使小青今日在

門楣知是不如男

小青傳常熟某生作蘇
沈周二旦皆常熟人

再疊前韻四首

有時蟬冕映貂璫高髻俄成宮樣妝若許雙飛同被寵

誰人應喚小娘娘

龍川雜志有大娘
娘小娘娘之稱

愛殺櫻桃一點脣子山曾是掌中珍他年出牧臨江夏

認取青油幕下人

用蕭詔事

偷晴滑笏似含羞，香汗歌殘爇欲流。豈是破瓜年紀小，
破瓜二八也。象文。象形人或誤解。十三早襲富平侯。

一時粉黛無顏色，分得餘桃味最甘。拋却萱花栽夜合，
但能蠲忿未宜男。

許月谿壁上作老梅圖歌

山中昨夜疾雷過，春意迸空寒色破。壑底失却老螭龍，
飛到墻坳偃蹇臥。鼻觀髣髴聞古香，紛紛撲面蒼雪涼。
乃知畫師逞舊手，寫出雙枝屈鐵十尺長。槎枿攫拿鱗
爪動，根須怒磔之而張。我初怖畏不敢逼，久覺花魂詩
癖兩相入。疑有遊蜂戲蝶穿，隙隙月溪家在三山曲。千
樹梅花圍老屋，上有層樓高插雲。下有清流寒漱玉，一

紉寒亭詩集

卷四

三三

朝走馬長安市，何異隔斷弱水蓬山三萬里。紙牕月白
不能眠，試作此圖自比擬。吾欲先生添綫筆，瘦竹疎松
相間植。歲寒之友共晨夕，面目水霜心鐵石。他年宦海
正茫茫，筆亦塵勞宛殊墨。再欲貌此冷韻幽姿，豈可得
上元前四日西厓招同西溟東江漢瞻西齋小飲

限用昌黎贈張祕書韻

門罕雜賓至，剝啄靜不聞。入座先一士，聯鑣得五君。尚
不辨客主，何況乃禮文。神怡水釋凍，氣盛山蒸雲。挹彼
矚宇爽，吐此齒頰芬。東西若樹黨，東江與西厓西齋連日舌戰少長
仍同羣。觴無苛政設，詩竟險韻分。地皆千乘賦，勢吞百
萬軍。音響淡入古，滋味醇易醺。庭竹映孤翠，瓶花助氤

盦雅集昔所記此樂吾亦云素懷殊蕭散清謔起糾紛
周旣遣房累何未厭腥葷誰爲代樽俎絕倒敬帽裘尾
毒非被薨口鋒莫嘲蚊用范石湖詩雷陳誠膠漆曾史盡蘭
薰志在垂述作力共討典墳詞源借跌宕菘圃資耕耘
茲者實文戰非徒策酒勳歸鞭信馬去遠山帶夕曛

上元前二日東江考功席上同諸子用東坡岐亭

詩韻

我如鹽車駟汗流灑灑汁又如銜索魚過河寧响濕故
人惠窮友竟此追隨得文讌張華燈稠疊徵召急豈知
才思短粗比能言鴨披拂帝里春出井初發罨九衢百
萬家鎔作火城赤仰不見星芒盡奪月光白酒熱透重
紺寒亭詩集

卷四

三

裘座上或岸幘連日逢歡飲宵豈夢哭泣所願周復始
迴環不一缺諸公迭爲主許我但爲客催詩倘太苛便
不預茲集

元夕同諸子集西齋寓邸以樂天明月春風三五
夜分韻得夜字

祭酒家風未凋謝考功同鄉老同社吳如威鳳棲梧桐
唐如洞庭奏韶夏編修清水盛玉壺蕊谿蓮峯插太華
張髯疎秀野鶴姿宮髯噴薄江濤瀉六子分閫建旗鼓
我合鞞刀紅首帕京師上元燈市鬧火樹星橋爭閣架
同人連夕文讌開相過不用相迎迓思風言泉迸空發
璧月珠燈光照射自昔作者登吟壇此道風流歸蘊藉

婁東濟南近驕矜虞山宗伯雜詈罵夫惟卓爾大雅存
羞爲夸誕卑權詐 聖代詞章軼前古四海宗工集都
下數子聯吟偶一堂人有底忙此閒暇文人召讞亦有
媒惟有謙和室其罅姜侯設膾是權輿去年此月當此
夜三百六十一擲梭猶喜春風入杯斝官軍指日向君
延 天子出征親祭禡直廬學士著兜牟吾曹酒煖儒
冠卸書生不復望封侯歌咏太平沐聖化

恭送座主南昌太常公奉 勅往河南致祭前代

帝王陵

清卿 帝簡股肱臣傳 詔今朝 寵命新崇祀皇王

稽古典分行元愷正同寅同時出使 餞看祖帳千官擁

紺寒亭詩集

卷四

五

津 禮比 鸞輿萬乘親春煖燕山晴色照抗旌前指大河

其二

通岸帶跨佩金魚咫尺 天威在簡書 聖世重開龍

馬瑞太昊陵在陳州 地靈原出斗牛墟典司禮樂一夔足製作

文章兩漢如遙計葵花初向日還朝入對 紫宸居

其三

十年夢想中州舊未得雍容俎豆旁車騎昔曾留轍迹

山川今更吐光銜敢言阮瑀能書記久許彭宣侍講堂

爲羨衝雲南去鴈一行天際入微茫

宮子友鹿攜尊約同諸子集西齋寓是日余先赴

月川梅師席歸途昏黑不能如約諸子限韻分得
衫字

觴詠知交不立監未離函丈正巖巖同堂東井占星聚
歸騎西山落日銜設醴漫勞虛末席行廚枉費典春衫
不辭韻險成拘束難逐文江萬里帆

許月溪扇頭畫梅一枝相贈

疎花帶月影逃離不寫全株寫一枝已飽風霜成鐵石
根柯容易教人知

侯官陳省齋編修自遼左入都率爾投贈

才名弱歲冠羣賢豈料遭逢坎壈纏陷賊曾修衣帶表
投荒竟謫夜郎天君恩衰白全要領物論雌黃待簡

紺寒亭詩集

卷四

五

編蘇李於今皆返國細將心迹訴當年

戲贈同年李靜菴侍御二十韻李時納姬人

柏府春先到蘭房月最明砌桐初引鳳池柳暗藏鶯主
孟家承乏佳人目早成金能傾騾裹珠乃購青嬰簾煖
犀釘簇箏調鴈柱橫釵梁百琲直衣袂六銖輕簪筆添
雙嫵鳴珂侍五更工詩如盼盼抗禮漸卿卿螺翠聽花
映綃紅豸繡爭缸凝銷刻晷漏響動巖城服匿温還褪
輕容熨正平葳蕤開午夜豈蕊吐新晴鴛帳臍噴麝駝
尼血染猩鍊知珍乳石療不用倉庚明惠生周顛風流
伴子京籥鉤俾筦庫樽俎善侯鯖異日嘗湯餅今茲試
鼎烹杏園霞作片蒲筍玉抽萌客且來投轄公宜速舉

觥未應愆宿諾恐有不平鳴

海寧陳節母查夫人聲山女兒也索贈有作

鸞影分飛鏡裏孤義方廿載正勤劬機常夜積冰霜苦
賦就東征錦繡鋪王氏一門稱養炬謝家羣從有封胡
班隨命婦朝典慶莫戀潘輿入畫圖

東省齋編修索題寫照卷

陰谷鮑陽曜寒林無春姿士旣抱孤憤安所辭嶮巖繁
絃扣哀玉悽絕感心脾激彼霜月苦驚此塞草衰衝起
沙渚鴈拍拍摩天飛黃金易銷鑠白璧易瑕疵敢冀千
載下復有鍾子期

磁缸中畜金魚數尾愛其游泳若自樂者

紺寒亭詩集

卷四

七

碧益近朱闌悠然生趣完懷文影自匿狎隊意粗安滋
味庖廚遠波濤江海寬知非變化質不復望雲端

乙亥二月移寓蘿軒值庭中桃花初放今此花又
發而余浪跡猶昔感物序之芳妍悲旅情之飄泊

輒假毫素用抒淹鬱云爾

入門曾對此瞥眼又東風人看添衰白花憎依舊紅家
園縈夢裏春色度愁中莫戀羈棲客芳尊暫爾同

馮文子孝廉痛其室人丐余作詩哀之

稚髻麻衣共食貧半生相對敬如賓可憐興慶朝班裏
不是堂前舉案人

其二

護觀曾傳賈氏妻南史孝義傳賈恩事君家風義古人齊悼亡不
比安仁詠國史他年備考稽

丙子二月二十九日奉

旨復職叙用用岐亭詩

韻紀其事

憶昔傳臚唱袍皆染柳汁叨此氣味同如水亦流濕不
謂遘迤邐災乃因福得借我軀命微解彼獄詞急禍樞
潛伏藏扞弓巧射鴨惘惘五年中舉眼若蒙幕奔走六
街塵頭焦雙脚赤差幸清論在本末爲別白貲代輸邊
庭 詔仍賜冠幘痛定悲故創未歌先下泣敢云舊物
完聊復補其缺况聞外吏賤驅使等奴客知己強慰藉
憂喜正交集

紉寒亭詩集

卷四

三

枕上口號

鄰寺鐘微到枕勻疎簾漏月白生鱗詩吟舊和如尋友
花泛清香太逼人攜酒擬同郊外賞禁烟又是客中春
先瑩五載虛澆莫腸斷松楸一斬新

丁香花下作

得地根株好繁花一倍增庭陰香霧裊牕曙煖霞蒸爛
慢春無賴清狂我尚能主人吟賞共絲管爲張燈

再觀許月溪壁上畫梅得盛字

畫松要扶疎畫竹要瘦勁畫梅得梅格蓋亦有情性根
盤屈菌蠢枝披突恣橫右舒或左紐拗峭傲不應芳馨
雖內含麤獷若物病譬彼負氣人全以骨力勝蘊釀萬

卷書清芬自包孕不肯習妍媚骹骹屈已聽許子高興
發潑墨及人定我忽睡思消指摩老眼瞪放筆落遠勢
整容已肅敬乍驚銅柯奇旋綴冰花盛冷然雪月姿疎
臆兀孤映京師富桃李宴賞簇鞭鐙此匪物土宜毋乃
不爲佞強圖在此壁貌腴神弗競我有剡溪藤瑩澤新
磨鏡繪成伴歸裝庶與此花稱

邀西厓西齋二同年題冊子久不至因小誌

二妙今誰匹一言曾久要未應許不與何以慰無聊契
分叨收錄才情豈吝驕郵筒天際落待此百憂銷

三月上巳狹向濤庶常攜酒饌邀諸子遊賞李氏
容膝圍余以冗累未及赴悵然有述

紉寒亭詩集

卷四

三九

勝事今朝并

又值清
明節

羣賢此會難市喧藏綠野客座俯

清湍物候同和煦詩成互詠歎吾從想像得恍惚入林
端

蘿軒戶部製江南早春小景系以長句

半幅生綃大如掌盎然涌出萬斛春上膏煖潤水泉動
林巒意思皆欣欣短衫露頂者誰子飽食鬪此山根雲
是何郡國何樂土有此無懷葛天民先生落墨想像耳
竊恐粉飾非其真座中吾是江南人

客臆

臆紙如雲葉燈斜夢乍醒忽看花送影知是月當庭

其二

客眠驚夜起白浸一階水怪得孤衾寒身在菱苕裏

月溪畫竹了邀余及顧若周賞之

風枝翻舞似翔鸞醉筆沾袍墨未乾燈下狂吟自叫絕
鄰牀驚起爲傳看

送錢石城進士之任洛陽

八斗才名四十強山川清淑出錢塘盡誇能吏成連壁
令弟幼昆任貴陽更爲宣公置一莊卜邑古稱惟洛食愛民今
不貢姚黃龍門伊水乘休暇除却尋詩有底忙

耐寒亭詩集

卷四

三

耐寒亭詩集卷四終



